



PRAVILNIK  
O ODBOJKAŠKIM REPREZENTACIJAMA BiH

Sarajevo, novembar 2021. godine

Na osnovu člana 30. Statuta Odbojkaškog saveza BiH, Upravni odbor OS BiH na sjednici održanoj 22.11.2021. godine donio je

## PRAVILNIK O ODBOJKAŠKIM REPREZENTACIJAMA BiH

### 1. OSNOVNE ODREDBE

#### Član 1.

Ovim pravilnikom se regulišu pitanja, zadaci i obaveze stručnih štabova svih odbojkaških reprezentativnih selekcija u Bosni i Hercegovini, koje se odnose na stručni rad, realizaciju priprema i učešće selekcija na zvaničnim takmičenjima u organizaciji FIVB i CEV, na turnirima i prijateljskim utakmicama koje se organizuju po zvaničnim međunarodnim odbojkaškim pravilima.

Reprezentacije predstavljaju Odbojkaški savez Bosne i Hercegovine na svim međunarodnim takmičenjima.

#### Član 2.

Pod nazivom odbojkaške reprezentacije BiH (u daljnjem tekstu reprezentacije) rade ženska i muška reprezentacija, u okviru kojih su seniorska, juniorska, kadetska i pionirska selekcija.

#### Član 3.

Reprezentacije čine odbojkaši/ice (u daljnjem tekstu reprezentativci-ke) i članovi stručnog štaba.

Reprezentativce-ke bira selektor-trener reprezentacije. Širi i uži spisak reprezentativaca-ki se javno objavljuje.

Članovi stručnog štaba su: selektor-trener (u daljnjem tekstu: selektor), dva trenera, skaut reprezentacije, lekar i fizioterapeut-maser.

#### Član 4.

Selektor mora pravovremeno izraditi dugoročni plan i program rada reprezentacije, kratkoročni program pred takmičenja i kvalifikacije.

Selektor radi spisak sa širim izborom reprezentativaca na koje računa u dužem periodu.

#### Član 5.

Upravni odbor OS BiH određuje tim-menadžera za svaki nastup reprezentacije.

Službene nastupe pod ingerencijom FIVB i CEV može da prati jedan sportski novinar o trošku Saveza.

## 2. KLUBOVI

### Član 6.

Klubovi iz kojih su kandidati za reprezentaciju moraju selektoru omogućiti njihovo učešće u svim fazama priprema i nastupima reprezentacije.

### Član 7.

Klub član Premijer lige BiH i liga OS F BiH i OS RS koji daje odbojkaša/icu za seniorsku ili juniorsku reprezentaciju ima pravo na opravdano odlaganje nastupa u prvenstvenim i kup utakmicama.

### Član 8.

Ako predhodno prihvati, učešće u reprezentaciji može se otkazati samo iz opravdanih razloga.

Pod opravdanim razlogom se smatra smrtni slučaj ili teška bolest u porodici, teška povreda ili bolest, polaganje ispita u školi ili na fakultetu i spriječenost zbog obaveza na poslu.

Kao dokaz o opravdanom odsustvu podrazumjevaju se odgovarajući dokumenti nadležnih službi, organizacija, ustanova i slično.

Stepen povrede ili bolesti utvrđuje isključivo doktor reprezentacije ili Medicinska komisija OS BiH.

## 3. ODBOJKAŠI/ICE ODBOJKAŠKIH REPREZENTACIJA BiH

### Član 9.

Nastup u reprezentacijama je posebna čast.

Organi OS BiH će stimulirati i vrednovati nastup u odbojkaškim reprezentacijama i kroz normativna akta kojim se utvrđuju prava i obaveze, poseban tretman dati standardnim reprezentativcima-kama (priznanja, certifikati i dr.).

Odbojkaši/ice reprezentacije, kao najistaknutiji predstavnici BiH odbojke, moraju se brinuti o tome da dostojno predstavljaju odbojku BiH i Bosnu i Hercegovinu, ponašanjem na terenu i izvan njega biti primjer svima.

### Član 10.

Reprezentativac mora biti državljanin i sportski državljanin BiH, bez obzira na to igra li u zemlji ili inostranstvu.

Reprezentativcem se smatra odbojkaš/ica koji/a je registrovan/ana u FIVB O-2 ili CEV 05 takmičarskom obrascu.

### Član 11.

Putni troškovi za dolazak na pripreme i nastupe reprezentacija i povratak reprezentativaca koji nastupaju u inostranstvu regulišu se u skladu sa

pravilnicima CEV, a odbojkašima/icama iz klubova sa prostora BiH troškove putovanja za dolazak i odlazak obezbjeđuju klubovi.

Upravni odbor OS BiH odlučuje o naknadi ostalih troškova.

#### Član 12.

Za rad i uspjeh u radu reprezentativcima-kama i članovima stručno-tehničkog štaba reprezentacije mogu se dodijeliti priznanja i nagrade.

Visinu novčane nagrade određuje UO OS BiH na prijedlog selektora, a pojedinačne iznose prema zaslugama i rezultatima određuje selektor.

#### Član 13.

Reprezentativci-ke moraju tokom priprema i nastupa potpuno izvršavati obaveze koje im odredi stručni štab, a svi se članovi reprezentacije moraju pridržavati odluka tim-menadžera na putovanjima, utakmicama i turnirima, izuzev stručnih poslova selektora za koje je nadležan i o njima samostalno odlučuje.

Posebno se moraju pridržavati obaveze vraćanja opreme i plaćanja računa koje su nastali ličnom inicijativom kao vanpansionske usluge.

U slučaju nepridržavanja obaveze iz prethodnog stava, pokrenut će se disciplinski postupak protiv prekršioca.

### 4. SELEKTOR-TRENER

#### Član 14.

Selektor-trener reprezentacije mora biti stručno osposobljen za neposredno organizovanje i rukovođenje radom reprezentacije.

Selektori-treneri reprezentacija moraju ispunjavati slijedeće uslove:

- a) imati visoku ili višu stručnu školsku spremu iz oblasti sporta i fizičkog vaspitanja, ili
- b) imati visoku ili višu školsku spremu iz drugih oblasti, diplomu i licencu za rad u oblasti sporta, ili
- c) imati status vrhunskog sportiste s diplomom za rad u oblasti sporta.

#### Član 15.

Selektora imenuje Upravni odbor OS BiH.

Nakon što se utvrdi da kandidat ispunjava osnovne uslove utvrđene Zakonom o sportu BiH prednost imaju oni kandidati koji ispunjavaju i druge uslove:

- iskustvo u obavljanju dužnosti trenera – selektora,
- ostvarene rezultate u struci,
- poznavanje engleskog jezika,
- prihvatljive lične zahtjeve.

#### Član 16.

Nakon imenovanja selektor obavlja svoj posao kao dodatnu djelatnost uz naknadu ili kao volonter.

Status, prava i dužnosti selektora uređuje se posebnim ugovorom u skladu sa ovim pravilnikom ako su angažovani uz naknadu.

#### Član 17.

Selektori se imenuje posebno za mušku i za žensku reprezentaciju, a za svoj rad su odgovorni Upravnom odboru OS BiH.

Selektori predlažu trenere odbojkaških reprezentacija.

#### Član 18.

Selektori se imenuje na četiri godine (jedan olimpijski ciklus), u roku od 60 (šezdeset) dana od završetka Olimpijskih igara.

Nakon isteka toga perioda selektor može biti ponovo imenovan na istu dužnost.

#### Član 19.

Selektor može biti razriješen dužnosti i prije isteka mandata:

- ako se ne pridržava Pravilnika i Kodeksa ponašanja u OS BiH,
- ako u ostvarenju plana i programa rada izostanu zadovoljavajući rezultati reprezentacije,
- ako svojim djelovanjem narušava ugled odbojke,
- zbog razloga predviđenih Zakonom ili odredaba iz međusobno sklopljenog ugovora.

#### Član 20.

Ukoliko selektor podnese ostavku ili mu prestanu obaveze zbog nekog drugog razloga, UO OS BiH imenuje vršioca dužnosti do imenovanja novog selektora.

#### Član 21.

Poslovi i zadaci selektora su:

- izrada godišnjeg plana rada s reprezentacijom, koji usvaja UO OS BiH,
- izrada godišnjeg programa rada s reprezentativcima po pojedinim dijelovima i vremenskim periodima,
- određivanje šireg spiska reprezentativaca za svaki nastupajući period,
- određivanje užeg spiska reprezentativaca za svaki naredni nastup reprezentacije,
- stručno vođenje treninga i utakmica reprezentacije,
- izrada pojedinačnih programa rada reprezentativaca u klubovima i nadzor nad provođenjem tih programa.

Prilikom selektiranja odbojkaša/ica potencijalnih kandidata/kinja za

nastup za odbojkaške reprezentacije OS BiH, selektori su obavezni primjenjivati Standarde za selektiranje odbojkaša/ica u OS BiH.

#### Član 22.

Selektor seniorske reprezentacije prati napredak i razvoj mladih odbojkaša/ica, mogućih kandidata za reprezentaciju, rad i rezultate mlađih reprezentativnih selekcija.

#### Član 23.

Selektor je dužan da saraduje na visokoprofesionalnoj osnovi sa odbojkašima/icama, klubskim trenerima, medicinskom komisijom i stručnjacima ostalih struka, članovima organa OS BiH i direktorom odbojkaških reprezentacija, radi stvaranja što boljih uslova za postizanje vrhunskih rezultata reprezentacije.

#### Član 24.

Pri izboru kandidata za reprezentaciju selektor je samostalan, ali je obavezan saradivati sa klupskim trenerima.

Selektor neće pozvati u reprezentaciju odbojkaša/icu koji/a je ispoljavao/la uzražen oblik nesportskog ponašanja u klubu ili reprezentaciji i u javnom životu.

#### Član 25.

Selektor je obavezan podnijeti UO OS BiH pisani izvještaj o pripremama i svakom nastupu na takmičenju u roku od 30 dana nakon završetka pojedine akcije.

#### Član 26.

Selektor je na poziv obavezan učestovati u radu sjednice UO OS BiH.

Na kraju kalendarske godine selektor podnosi UO OS BiH pisani izvještaj o radu i rezultatima u toj godini, koji mora sadržavati ocjenu rada saradnika.

## 5. DIREKTOR REPREZENTACIJE

### Član 27.

Upravni odbor OS BiH i kancelarija OS BiH stvaraju materijalno-tehničke uslove za rad reprezentativnih selekcija.

Za rad reprezentativnih selekcija Upravni odbor OS BiH imenuje direktora odbojkaških reprezentacija BiH (u daljnjem tekstu direktor).

Direktor ima pravo i obavezu:

- stara se o ukupnoj organizaciji okupljanja, priprema i nastupa odbojkaških reprezentacija prema kalendaru takmičenja reprezentativnih selekcija,
- koordinira izradu i realizaciju programa i planova stručnog rada u OS BiH,
- stvara materijalno-finansijske uslove za rad reprezentativnih selekcija,
- obezbjeđuje sponzore i donatore,
- organizuje marketinške poslove u vezi sa nastupom reprezentacija.
- obavlja po potrebi i druge poslove koji su neophodni za adekvatno reprezentovanje odbojkaškog sporta BiH.

### Član 28.

Direktor reprezentacija obavlja svoj posao volonterski ili uz naknadu po ugovoru, u skladu sa aktima Saveza.

Status, prava i dužnosti direktora uređuju se posebnim ugovorom, u skladu sa ovim pravilnikom.

### Član 29.

Direktor reprezentacija odgovoran je za svoj rad Upravnom odboru OS BiH.

### Član 30.

Za direktora reprezentacija može biti imenovano lice koje osim uslova predviđenih Zakonom ispunjava i slijedeće uslove:

- da ima radnog iskustva na takvim ili sličnim poslovima,
- da govori jedan od službenih jezika Svjetske odbojkaške federacije,
- ima zapažene uspjehe u svom ranijem radu.

## 6. ZDRAVSTVENA ZAŠTITA

### Član 31.

O zdravstvenoj zaštiti reprezentativaca brine Medicinska komisija OS BiH i ljekari angažovani u reprezentacijama.

#### Član 32.

Ljekare reprezentacije imenuje Odbor za hitna pitanja OS BiH za pojedine akcije reprezentacija, pri čemu je zavisno od mogućnosti poželjan kontinuitet u radu.

Ljekar reprezentacije prisustvuje pripremama i nastupima u zemlji i inostranstvu, ako nije osigurana medicinska zaštita na drugi način.

#### Član 33.

Ljekar reprezentacije saraduje s klubskim ljekarima i ima pravo uvida u zdravstveni tretman reprezentativaca i kandidata za reprezentaciju u klubu.

#### Član 34.

Ljekar reprezentacije mora voditi pojedinačne zdravstvene kartone reprezentativaca i kandidata za reprezentaciju: istorija bolesti i povreda, vrstu povreda i učestalost, te način liječenja koji se primjenjuje i njegovu djelotvornost.

#### Član 35.

Svi članovi reprezentacije u provođenju programa i rada reprezentacije osigurani su preko OS BiH u jednom od osiguravajućih društava u BiH, u skladu sa propisima.

### 7. SPORTSKA OPREMA

#### Član 36.

OS BiH obezbjeđuje sportsku opremu za nastupe u reprezentaciji.

Prema materijalnim mogućnostima OS BiH obezbjeđuje reprezentativcima i opremu za slobodno vrijeme, kao i odjeću za svečane prilike.

Reprezentativci moraju tokom svih aktivnosti reprezentacije nositi isključivo opremu koju je nabavio OS BiH, a nakon završene akcije vratiti je ovlaštenom licu u OS BiH.

Reprezentativci moraju čuvati službenu opremu. Ošteti li se ili izgubi (daruje) dio službene opreme propustom reprezentativaca, odbojkaš/ica mora nadoknaditi nastalu štetu, a u protivnom će se protiv njega/nje pokrenuti disciplinski postupak.

O sportskoj opremi brine ekonom reprezentacije ili lice koje odredi generalni sekretar OS BiH, ukoliko nije imenovan ekonom.



## 8. ZAKLJUČNE ODREDBE

### Član 37.

O provođenju Pravilnika brine se generalni sekretar OS BiH.

O provođenju Pravilnika generalni sekretar izvještava UO OS BiH koji preduzima mjere.

### Član 38.

Tumačenje odredbi Pravilnika daje Upravni odbor OS BiH.

### Član 39.

Pravilnik stupa na snagu danom donošenja.

### Član 40.

Stupanjem na snagu ovog pravilnika prestaje da važi Pravilnik o odbojkaškim reprezentacijama Bosne i Hercegovine objavljen pod brojem: 01/1-377/17 od 31.05.2017. godine.

Broj: 01/1-419/21

Datum, 22.11.2021. godine



PREDSJEDNIK  
Milutin Popović s.r.